

Powšitkowne WOZJEWJENJA

njedźelu, 16. nowembra 2014

Nyšpor a procesion ze swěčkami w Róžeńće

Towarstwo Cyrila a Metoda z.t. přeprašuje wěriwych ze wšitkich wosadow na pokutnym dnju srjedu, 19. nowembra, w 16 hodž. k nyšporu do Róžanta, kotremuž přizamknje so procesion ze swěčkami. Z tym ma so dżakować za měrliwy politiski přewrót před 25 lětami, spominać na spočatk Prěnjeje kaž tež Druheje swětoweje wójny, prosyć wo zdžerženje hnadowneho městna Róžanta a Božeje stwórby we Łužicy kaž tež wo měr a pokoj na zemi.

Hdyž kročimy w procesionje ze swěčkami po Róžeńće, pomysly na Jězusowe słowa „Wy sće swětło swěta“ (Mt 5,14). Njeh naši sobučłowjekojo naše dobre skutki widža we wšědnym žiwjenju. Přewozmy wšitcy zamołwitosć za swět kołowokoło nas. Dar swobody a prawdy měli přeco zaso zakitować a so z problemami našeho časa ro-zestajeć.

Za procesion su swěčki spřihotowane. Kóždy pak móže sej tež sam swoju swěčku sobu přinjesć.

Jurij Špitank, předsyda TCM

TCM – „Łužica pomha“ prosy wo dary za Krupku

Towarstwo Cyrila a Metoda z.t. (TCM) chce ze swojej lětušej pomocnej akciju „Łužica pomha“ wobnowjenje kapałki ze studničku swjateje Marije w Krupce podpěrać. Na tu-te putniske městno putnikuja młodži a starši katolscy Serbja kóžde lěto pěši, z kołom, awtom abo busom. TCM prosy wěriwych wo šćedriwe dary na konto Cyrill-Methodius-Verein, IBAN: DE65 750 90 300 000 828 23 66, BIC: GENO DEF1 M05 pola banki Liga pod hesłom „Łužica pomha“.

J. Špitank, předsyda TCM

Hłowna a wólbna zhromadźizna Bratrowstwa

Wšitcy člonjo a zajimcy su wutrobnje přeprašeni na hłownu a wólbnu zhroma-dźiznu Bratrowstwa. Wona budže wutoru, 18. nowembra, w 19 hodž. na wjesnej žurli w Salowje.

Zetkanje samostejacych

Samostejacy ze serbskich wosadow su na zetkanje wutoru, 2. decembra, w 14 hodž. do Domu biskopa Bena w Smochćicach přeprašeni. Zajimcy njeh so hač do štwórtka, 27. nowembra, w redakciji Katolskeho Posoła přizjewja, telefonowe čisło (0 35 91) 55 02 12. Štóz chce wotewzaty być, njeh to prošu zdžěli.

Poswjećenje swjateho křiža w Kamjencu

Starobiskop Joachim Reinelt poswjeći wutoru, 18. nowembra, w 14.30 hodž. w Kamjencu nowy drjewjany swjaty křiž. Tutón je rjad maltezew njedaloko chorownje na rózku Njebjelčanskeje k wotbóčce do boršće postajił. Wšitcy su na poswjećenje přeprašeni.

Pobožnosť jako džak a próstwa w Róžeńće

Towarstwo „Naša Knjeni na Lipje z.t.“ přepróšuje wšitkich česćowarjow Róžeńčanskeje swjateje Marije wutrobnje na pobožnosť jako džak a próstwu kaž tež wo zastupnistwo při Božim trónje wutoru, 25. nowembra, po wječornej Božej mši. Kemše su we 18 hodź. w Róžeńčanskej swjatnicy. Na pobožności modla so w naležnosćach towarstwa, ale tež w swójskich naležnosćach a serbskeho ludu.

Komedija w Nowoslicach

Dalše předstajenje komedije „Jedyn Šwjerčik přińdže zředka sam“ budže tutu njedzelu, 16. nowembra, w 16 hodź. w Nowoslicach pola Dinarjec. Tam poskićuja hižo wot 14 hodź. kofej a tykanc. Hrajerjo Chróšćanskeje dźiwadłoweje skupiny wšitkich wutrobnje přepróšuja.

Hromadža hodowne dary

Towarstwo swjateje Filomeny z.t. chce tež lětsa džěci a swójby w čěskim Dolním Podluží, w bořarskim měšće Razgradze a wokolnych wsach z hodownymi pakćikami zwjeselić. Jich wobsah njeje předpisany. Wotedać móža so pakćiki wot pónđzele do štwórtka, 17. do 20. nowembra, stajnje wot 17 do 18 hodź. w Smjerdžečanskim kulturnym domje. W tutym času přijimuju tohorunja derje zdžeržanu drastu a počehnjenja. Dalša móžnosť podpěry su pjenježne dary, z kotrychž ma so transport financować kaž tež wšelake socialne zarjadnišća podpěrać. Přepokazać móža so na konto St. Filomena Verein e.V., IBAN: DE45 855 90 000 037 262 47 01, BIC: GENO DEF1 BZV pola Ludoweje banki Budyšin e.G. pod hesłom „Razgrad“ abo „Dolní Podluží“.

Gerat Róbl, předsyda towarstwa

Zhromadny čas jeniče z papu w Smochćicach

Pod hesłom „Papa, powědaj raz!“ su nanojo ze swojimi džěćimi wot pjatka do njedzele, 21. do 23. nowembra, do Domu biskopa Bena w Smochćicach přepróšeni. Tam móža zhromadnje rjanej dnjej přežiwić. Planowana je na přikład slědženska ralley po Budyšinje, kotrejž přizamknje so wopyt jedneje z wjele wěžow města. Wosebje wažne pak je zarjadowarjej, zo mataj nan a džěco čas za sebje. Zajimcy měli so w Smochćicach přizjewić, telefonowe čisło (03 59 35) 2 23 17. Tam zhonja tež dalše nadrobnosće.